



Ina bella paletta cun artitgels per fans è da chattar èn il Manor a Cuira.

FOTO G. N. STGIER

D'in di a l'auter vegn vendì dapli

Brasilia 2014 e la vendita dals artitgels per fans

DA GION NUTEGN STGIER / ANR

■ **Er sche l'euforia da ballape è da preschent anc ruassai vla fan las butias che vendan tricots, schals e bandieras da la Svizra ed autras naziuns buns affars. Pli manaivel ch'il campinadi da ballape vegn e dapli ch'ils fans cumpran.** A partir da gievgia proxima stat ina occurrenza da sport en il center e quai è il Campinadi mundial da ballape che ha lieu en Brasilia. Actualmain è l'euforia er tar nus betg anc uschè gronda e tutina spetgan ils fans cun malpazienza sin il turnier cun 32 equipas. L'euforia tar ils esters è bunamain pli gronda, cunzunt tar ils Portugais e Taliani. Quai conferman er las butias che vendan ina paletta artitgels per fans. A Cuira han tranter auter trais butias pli grondas en lur sortiment da quels artitgels per ils fans da ballape. Quai èn il Manor, l'Ochanser Sport e l'Athleticum.

Quant vinavant ch'in team vegn è dependent

Steve Schennach, il pledader da pressa da la Dosenbach-Ochanser SA, ha ditg

ch'in campinadi da ballape saja bain ina schanza per vender dapli artitgels. Tenor las experientschas fatgas tar ulteriuras grondas occurrenzas da ballape cumenza l'affar curt avant ch'il turnier entschaiva. Quest mais e lura il fanadur èn da gronda impurtanza er per nossas butias. Il team svizzer saja natiralmain in factor da gronda muntada per far buns affars. Bandieras, schals, tricots e caps da l'Italia, la Spagna, il Portugal e l'Olanda sa vendan er bain, ha ditg Steve Schennach. La Brasilia sco organisatura dal turnier vegnia dentant er ad avair ina influenza sin la vendita da tuts quels numerus artitgels. Quant vinavant ch'in team vegnia en il turnier saja dentant fitg dependent per la vendita.

Il tricot uffizial

Cuntent cun ils affars fin oz è er Antonio Govetos, il schef da marketing da las butias Athleticum. L'interess per ils artitgels s'augmenta d'in di a l'auter e pli datiers ch'il campinadi vegn e megliers affars ch'i vegn fatg. Il success sportiv d'ina equipa saja da gronda impurtanza per la

vendita dals artitgels. Bain sa vendan cunzunt tricots e t-shirts cun ils nums dals giugaders svizzers cun esser Athleticum il shop da fans uffizial da la Federaziun svizra da ballape. Quatras avain nus er ina collecziun speziala, ha ditg Antonio Govetos. Cumprads vegnan lura er bliers tricots da la squadra azzura, dals Spagnols e dal Portugal, menziuna noss infurmant.

Trais giadas dapli

Er en il Manor a Cuira è la paletta cun artitgels per fans multifara. Cumprar pon ils fans cunzunt bliers caps da las naziuns che tutgan tar las favoritas tar il campinadi mundial da ballape 2014. Dasper ils tricots da la Svizra vendain nus er bain ils tricots da l'Italia e dal Portugal, accentuescha Mario Tomaschett. Er accessoris pli pitschens èn in success da vendita, sco per exempel bandieras ubain portaclavs ed anc blier auter. Nus vendain da preschent trais giadas dapli artitgels per fans, ha ditg Mario Tomaschett. Ils pretschs per tricots, bandieras, schals etc. van da tschintg francs fin 80 francs e quai en tuts trais affars.